

澤州府志卷之三十三

秩官志

宦蹟 守牧 倅貳 縣令 師儒 丞尉 弁員入兵制

應劭曰漢官曰尹正也郡府聽事壁諸尹畫贊肇自建武訖平陽嘉注其清濁進退所謂不隱過不虛舉甚得述事實後人是瞻足以勸懼是自古秩官書壁不惟留姓名著宦蹟而已後此祇書壁不紀事所云春秋采毫毛之善貶纖芥之惡不避王公者無有也澤自前明王守朝雍踵書壁事百五十年凡百有一人倅尉師儒不與焉而舊志可考者尙夥至於某也賢某也才某也不肖自在民心版中不必如劭所云也其政績懋著列宦蹟一卷何武在任無赫赫之名去後常見思未始非賢也故咸著其名爲秩官

澤州府志

卷之三十三 宦蹟

志第六

宦蹟 後附許氏田氏所補其已見舊志者不列田補中又見許補者亦節去

澤州府鳳臺縣

前漢任敖沛人高祖初起敖以客從爲御史守豐二歲高祖立爲漢王東擊項羽遷上黨守陳豨反敖堅守封爲廣阿侯

後漢馮異字公孫潁川父城人以郡掾舉五城歸漢光武署異爲主簿尋拜偏將軍從平河北時更始遣舞陰王李軼大司馬朱鮪等守洛陽光武乃北徇燕趙拜寇恂爲河內太守異爲孟津將軍與恂合勢以拒朱鮪等異乃遺書于李軼軼覺悟成敗乃報異書言軼本與蕭王首謀造漢今軼守洛陽將軍鎮孟津千載一會思成斷金軼遂不復與

吳爭鋒異因此得北攻天井關拔上黨兩城又南下河南
平成舉以東十三縣及諸屯聚因度河至洛陽破鮪建武
二年春定封封異陽夏音賈侯後征公孫述卒于軍謚曰節
侯

鮑昱字文泉上黨屯留人司隸校尉承子有智略建武初青
犢賊據太行太守戴涉請署守高都長昱應之遂討擊群
賊誅其渠帥道路開通祖宣父承及昱俱官司隸校尉時
號鮑氏三驄

北魏裴仲規河東聞喜人咸陽王禧爲司州牧辟仲規爲主
簿仍表行建興郡事車駕自代還洛次于郡境仲規備供
帳朝於路側高祖詔仲規曰朕開置神畿郡望崇重卿既
首應司隸羨舉復督我名邦何能自致也仲規對曰陛下

澤州府志

卷之三十三

宦蹟

二

竊神盡聖應天順民棄彼元壤來宅紫縣臣方罄心力躍
馬吳會冀功銘帝籍勲書王府豈一邑而已高祖笑曰冀
卿必副此言車駕達河梁見咸陽王謂曰昨得汝主簿爲
南道主人六軍豐贍元弟之寄殊副所望後征義陽戰沒
贈河東太守謚貞

裴衍字文舒仕齊主蕭寶卷魏宣武景明二年歸國請隱嵩
高詔許之世宗末出山干祿肅宗除散騎侍郎尋遷建興
太守轉河內太守衍歷二郡廉貞寡欲善撫百姓以母憂
解任吏民追思之

裴延儁字平子河東聞喜人北魏宣武時爲中書侍郎時宣
武專心釋典不事墳籍延儁上疏致諫後除司州別駕及
詔立明堂羣官博議延儁獨著一堂之論太傅清河王懌

時典衆議讀而笑曰子故欲遠符僕射也

司馬子如字遵業河內温人魏平姑臧徙居于雲中孝昌中北州淪陷子如携家南奔肆州爲介朱榮所禮遇假以中軍榮之向洛也以子如爲司馬持節假平南將軍監前軍次高都榮以建興險阻往來衝要有後顧之憂以子如行建興太守當郡都督永安初封平遥縣子邑三百戶

徐審字成伯丹陽人以醫術爲中散大夫歷齊州刺史建興太守初魏獻文欲驗其能置病人于帷中使審隔而脈之深得病形兼知色候遂被寵遇由是孝文宣武亦並加眷待審常有將餌及吞服道年垂八十而鬢髮不白力未多衰正始初以老爲光祿大夫卒諡曰靖子踐襲爵位建興太守

澤州府志

卷之三十三

宦蹟

三

北周楊擲字顯進正平高涼人周主宇文泰以擲有謀略堪委邊任乃表行建州事時建州遠在敵境三百餘里擲威恩夙著所經之處多並羸糧從之比至建州衆已一萬東魏刺史車折于洛出兵逆戰擲擊敗之卽授建州刺史却退魏將侯景師復授建州刺史鎮車箱及齊主高歡圖玉壁別令侯景趣齊子嶺擲恐入寇邵郡率騎禦之景聞擲至斫木斷路者六十餘里猶驚而不安遂退還河陽其見憚如此後進授晉建二州大都督周主邕保定四年遷少師其年大軍圍洛陽擲率義兵萬餘人出軹關然擲自鎮東境二十餘年數與齊人戰每常克獲以此遂有輕敵之心時洛陽未下而擲深入敵境又不設備齊人奄至大破擲軍擲以衆敗遂降于齊擲之立勲也有慷慨壯烈之志

及軍敗遂就虜以求苟免時論以此鄙之周主猶錄其功不以爲罪

李遠河州總管大將軍賢弟以應侯莫陳崇功遷高平郡守尋又授河東郡守遠敦獎風俗勸課農桑肅遏姦非兼脩守禦之備

北齊高構字孝基北海人好讀書工吏事仕齊主高歡歷徐州司馬蘭陵平原二郡太守齊滅周遷冀州司馬甚有能名徵拜比部侍郎尋轉民部

趙起字興洛廣平人齊主高澄擢爲建州刺史累遷侍中起高祖世頻爲相府騎兵二局典知兵馬十有餘年高洋嗣位起罷州還闕雖歷位九卿侍中常以本官監兵馬出內驅使居腹心之寄後除滄州刺史卒於官

澤州府志

卷之三十三

宦蹟

四

蓋豐洛者齊主高洋家人洋爲太原公時豐洛典知家務號曰蓋將後擢爲主書專令訪察除并省尙書都令史建州別駕

隋趙熒字賢通天水西人文帝以曉習故事徵拜尙書右僕射視事未幾以忤旨出爲陝州刺史俄轉冀州刺史甚有威德熒嘗有疾百姓奔馳爭爲祈禱其得人情如此冀州俗薄市井多詐熒爲銅斗鐵尺置之于市百姓便之

伊婁謙字彥恭鮮卑人少有志節文帝爲周相時授亳州總管俄徵還京既平王謙謙恥與逆人同名因爾稱字及文帝愛禪拜彥恭爲大將軍進爵爲公尋出爲澤州刺史清約自處甚得人和以疾去職吏民攀戀行數百里不絕後數歲卒於家子傑嗣

房恭懿字慎言河南洛陽人性沉深有局量達于從政開皇初以蘇威薦授新豐令政爲三輔之最時雍州諸縣令每朔朝謁文帝見恭懿必呼至榻前訪以理人之術蘇威重薦之超授澤州司馬有異績尋遷德州司馬帝每嘉歎嘗謂諸朝使曰房恭懿志存體國愛養我百姓恭懿所在之處百姓視之如父母當令天下模範之卿等宜師教也于顓字元武周大象中以水軍總管從肅孝寬經略淮南尉遲迥之反時總管趙文表與顓不協顓殺之因言文表與迥通謀及隋受禪文表弟詣闕稱兄無罪文帝令按其事太傅竇熾等議顓當死上以其門著勲績特原之貶爲開府後襲爵燕國公尋拜澤州刺史免卒于家

唐長孫順德無忌族叔太宗起兵以功進左驍衛大將軍封

澤州府志

卷之三十三

宦蹟

五

薛國公李孝常謀反坐與交削籍帝閱功臣圖見其像憐之遣視順德方頽然醉遂召爲澤州刺史復爵邑順德素少檢至是折節爲政以嚴明稱先時守長多通餉問順德繩撻無所容遂爲良吏前刺史張長貴趙士達占部中腴田數十頃奪之以給單貧民尋坐累還第喪息女感疾大病卒贈荊州都督諡曰襄

楊德幹高宗末歷澤齊汴相四州刺史治尚威郡人爲之語曰寧食三斗蒜不逢楊德幹

岑翔澤州刺史先天元年太上皇命有司頒賜諸州朝集使之善政者翔與同州刺史成大陝州刺史陸餘慶及魏州刺史單遠思宋州刺史劉智柔等各受賜物一百段李撝雍州長史新興王晉司功也晉遇害寮吏皆奔散惟撝

步從仍哭其屍姚崇聞之曰樂向之儔也擢尙書郎轉澤州刺史

郭子儀華州人肅宗上元之二年河中太原亂朝廷憂二軍與賊合而少年新將望輕不可用遂以郭子儀爲朔方河中北廷潞儀澤沁等州節度行營副元帥進封汾陽王屯絳州時帝已不豫羣臣莫有見者子儀曰老臣受命將死于外不見陛下目不瞑帝引至卧內謂曰河東事一以委卿子儀嗚咽流涕賜御馬襍綵絹布九萬子儀至屯誅首惡王元振等數十人諸鎮皆惕息

李抱玉本安興貴曾孫世居河西李光弼引爲裨校討安祿山有功上言耻與逆臣共宗詔賜姓擢陳鄭穎亳節度代宗立兼澤潞統相衛儀邢十一州兵僞燕史朝義寇澤州

澤州府志

卷之三十三

宦蹟

六

抱玉敗之以功受司空武威郡王懇辭王爵徙涼國公平吐蕃羣盜權鳳翔節度抱玉兼三節度副元帥位望隆赫每讓位許之在鎮禁暴安人爲將臣之良卒年七十四贈太保諡昭武

李抱真抱玉從弟沈慮而斷抱玉屬以軍事授汾州別駕僕固懷恩反抱真挺身歸京師代宗以懷恩倚朔方兵精憂之召抱真問狀對曰郭子儀嘗領朔方軍人多德之懷恩欺下曰子儀爲朝恩所殺今起而用之是伐其謀兵可不戰解也旣而如抱真策遷陳鄭澤潞留後旣謝因言百姓勞逸在牧守願得一州以自試更授澤州刺史兼澤潞節度副使徙懷乃爲懷澤潞觀察留後凡八年抱真策山東有變澤潞兵所走集乘戰伐後賦重人困軍伍彫剝乃籍

戶三丁之一蠲其徭租給弓矢令閒月得曹偶習射歲終大校親按籍第能否賞責比三年皆爲精兵舉所部得成卒二萬旣不稟于官而府庫實乃曰軍可用矣繕甲淬兵遂雄山東天下稱昭義步兵爲諸軍冠久之爲澤潞節度行軍司馬德宗嗣位藩鎮逆臣田悅朱滔王武俊李希烈李納李懷光相次反抱真獨以數州截然橫結潰叛中離沮其姦爲羣盜所憚興元中進義陽郡王李希烈旣竊位號欲臣制諸叛衆稍離天子下罪已詔並赦羣盜抱真乃遣客賈林以大義說武俊使合衆擊滔武俊諾而內宥豫抱真將自造其壁乃諉軍事於司馬盧元卿曰吾此行繫時安危使遂不還部勒以聽天子命惟子厲兵東向雪吾之耻亦惟子卽以數騎馳入見武俊曰泚希烈爭竊帝號

澤州府志

卷之三十三

宦蹟

七

滔攻貝州此其志欲自肆于天下足下旣不能與競長雄舍九葉天子而臣反虜乎且詔書罪已禹湯之心也今上暴露播越公能自安乎因持武俊涕下交頤武俊亦感泣左右皆泣退卧帳中甘寢武俊感其不疑乃誓天曰此身已許公死矣旦日別去武俊遂大破滔抱真喜士聞世賢者必欲與之游雖小善皆卑禮厚幣數千里邀致之晚好神仙術餌丹二萬丸卒詔贈太保李德裕言先後鎮澤潞者李抱玉抱真皆儒術大臣故卒賴其忠以定國

曲環陝州安邑人客隴右少喜兵法資勇敢善騎射安祿山反從魯炆守鄧州與賊武令珣力戰破之加左清道率從李抱玉屯河陽又自將兵守澤州破賊銳將安曉拜羽林將軍與諸將討史朝義平河北累轉金吾大將軍

王虔休字君佐汝州梁人少涉學有材武以信義爲鄉黨畏慕大曆中澤潞李抱真聞其名厚以幣招之授兵馬使從抱真討河北戰雙岡臨洛虔休以功多擢步軍都虞候封同昌郡王抱真卒元仲經等謀樹其子緘一軍思亂虔休正色語衆曰軍王軍州王土也帥亡當稟天子何云云有妄謀衆服其言得不亂德宗嘉之以邕王爲昭義節度大使擢虔休潞州左司馬領留後

陳少游以李抱真薦爲澤潞副使爲陳鄭留後

杜兼字處弘澤潞判官幼時遭安祿山之亂逃入終南山兼伯父存介爲賊執臨刑兼號呼願爲奴以贖遂皆免然性浮險爲濠州刺史時妄殺無罪僚屬衆皆寃之兼有從弟曰羔貞元初進士其父死河北母更兵亂不知所之羔憂

澤州府志

卷之三十三

宦蹟

八

號終日及兼爲澤潞判官鞠獄有媼辨對不凡乃羔母羔因得奉養而不知父墓區處晝夜哀慟他日舍佛祠觀柱間有文字乃其父臨死記墓所在羔奔往亦有耆老識其壠因是乃得葬

歐陽柅四門助教詹從子澤州劉從諫表爲幕府劉楨柅命時表斥損時政柅方休假還家或言柅爲之詔流崖州賜死臨刑色不撓爲書徧謝故人自誌墓

新唐書

盧從史以姦獍附邈中人得拜昭義節度旣得志寢恣不道府屬孔戡等屢以直語爭刺初唯唯後益不從皆引去元和中父喪去官從史卽獻計誅王承宗陰向帝旨繇是奪服領澤潞詔討賊逗留陰與承宗交憲宗患之初中尉吐突承瓘壁壘相對從史時過其營飲博承瓘出奇玩夸之

從史悅玩必遺焉從史喜益狎不疑帝用裴垍謀敕承攽圖之乃伏壯士幕下伺其來與語突起摔持出帳後縛內車中從者驚亂斬數十人諭以密詔而大將軍烏重孕素忠果部勒其衆乃定

烏重孕縛盧從史承攽牒署昭義留後李絳曰澤潞據山東要害磁邢洛跨兩河間可制其合從今逆豎就禽方收威柄遽以偏將莅本軍綱紀大紊矣河南北諸鎮謂陛下暗以官爵使逐其帥其肯默然哉宜以孟元陽爲澤潞而以重孕節度三城兩河諸侯聞之必欣然帝從之

王宰智興子武宗會昌中以忠武節度討劉稹進取天井關攻陵川破賊石會關進攻澤州其將郭誼殺稹降宰傳稹首于京師遂歷上黨太原節度使并回鶻党項屢立邊功

澤州府志

卷之三十三

宦蹟

九

終天雄節度使

張言澤州刺史僖宗光啟二年諸葛爽卒言與其將劉經共立爽子仲方爲留後

五代史延誦爲澤州刺史去之日軍民遮圍不放行并截下馬燈經三日後延誦乃夜開城門赴闕

後梁徐懷玉亳州焦夷人少事梁與梁主朱溫俱起微賤懷玉素以雄豪自任而勇于戰陣爲梁名將本名琮溫賜其名曰懷玉初爲齊州防禦使遷右羽林統軍屯于澤州晉人攻之爲隧以入懷玉擊之隧中晉人乃却俄拜保大軍節度使及溫卒朱友謙附于晉執懷玉殺之

李罕之項城人梁晉間賊也少拳捷初爲浮屠行勾市窮日無所得者抵鉢褫祇被去聚衆攻剽五臺下先是蒲絳民

壁摩雲山避亂罕之以百人拔之人號李摩雲隨黃巢渡江繼助李克用得河陽表爲節度性猜暴時大亂野無遺犴日剽人以食後與張言相攻窮奔河東克用復表爲澤州刺史光化初昭義薛志勤卒罕之夜襲潞入之克用遣李嗣昭先擊澤州拘罕之家屬罕之攻沁州道欵于汴朱全忠表爲昭義節度葛從周遂取澤州嗣昭攻罕之病卒于行嗣昭復取澤州以李存璋爲澤州刺史

牛存節青州博昌人爲人木彊忠謹梁主朱溫愛之會李罕之圍張全義於河陽全義乞兵于梁溫使存節以兵爲前鋒擊走罕之溫拜爲右千牛衛上將軍從康懷英攻潞州歸行至天井關聞晉兵攻澤州存節顧諸將曰吾雖不受命然澤州要害不可失也舉策而先士卒並飛騎趨澤州澤州府志

卷之三十三

宦蹟

十

存節入城助守晉人穴地道以攻存節選勇士數十亦穴地以應戰于隧中晉人解去

後唐裴約者潞州之牙將也莊宗以李嗣昭爲昭義軍節度使約以裨將守澤州嗣昭卒其子繼韜以澤潞叛降于梁約召其州人泣而諭曰吾事故使二十餘年見其分財饗士欲報梁仇不幸早世今郎君父喪未葬違背君親吾能死于此不能從以歸梁也衆皆感泣梁遣董璋率兵圍之約與州人拒守求救于莊宗是時莊宗方與梁人戰河上而已建大號聞繼韜叛降梁頗有憂色及聞約獨不叛喜曰吾於繼韜何薄於約何厚而約能分逆順邪顧符存審曰吾不惜澤州與梁一州易得約難得也爾識機便爲我取約來存審以五千騎馳至遼州而梁兵已破澤州約見

殺五代史

康延昭仕晉主石敬瑭爲尙食改散指揮都虞候出爲澤州刺史

後漢李萬超并州太原人幼孤貧負販以養母晉主石敬瑭起并門萬超應募戰累捷從討楊光遠飛石中腦氣不屬者久之開運中拒契丹於陽城流矢貫手超拔矢復戰以功授肅銳指揮使契丹入中原萬超屯潞州率本部入府署殺契丹僞署使復潞州路經澤州刺史翟令奇堅壁拒命萬超馳至城下諭之曰今契丹北遁天下無主并州劉公仗大義定中土所向風靡盍早圖之令奇乃開門迎納史弘肇卽留萬超權澤州事漢主劉暉遂以爲刺史連移斬登二州所至有善政

澤州府志

卷之三十三

官蹟

十一

宋石守信浚儀人仕周有軍功入宋領歸德節度與高懷德等帥師破李筠于長平斬首三千級又敗其衆三萬於州南礮子谷獲僞節度使范守圖降太原援軍數千皆殺之澤潞平以功加同平章事累官中書令加檢校太師進封衛國公

張崇誥澤州刺史建隆元年淮南節度李重進叛石守信討之旣平以崇誥坐重進黨棄市

宋昌言平棘人參知政事綬子以蔭爲司理叅軍惠政洽民善斷疑獄有殺人逮及無辜者昌言知其寃力請緝捕果得眞犯正之法寃抑獲以昭雪官至少府監卒

裴德裕聞喜人雍熙間出知澤州清廉不擾官至少府監

陳堯佐字希元閬中人省華子堯叟弟也端拱中進士及第

真宗景德時徙河東路轉運使以地寒民貧仰石炭以生
奏除其稅又減澤州大礦冶鐵課數十萬皆言利者所不
爲也嘗鑿太行險以通道民德之建除道興利碑累官至
集賢殿大學士壽八十二陳搏嘗謂其父曰君三子皆當
將相惟中子貴且壽後如搏言

王信太原人少勇悍大中祥符中盜起晉絳澤潞數州信應
募籍軍與其徒生擒賊七十人累以功補龍神衛指揮使
累官威德軍節度留後

李昭遘字逢吉宗諤從子性和易不忤物能守家法幼時楊
億嘗過其家出拜命賦既成億曰桂林之下無雜木非虛
言也後薦之召試授館閣累遷陝西轉運使坐家僮盜遼
人銀盃降知澤州初陽城冶鑄鐵錢民昌山險輸礦炭苦

澤州府志

卷之三十三

宦蹟

十一

其役爲奏罷鑄錢百姓德之又言河東鐵錢真僞淆雜不
可不革尋復直史館知陝州終天章閣待制

呂公孺字穉卿任爲奉禮郎賜進士出身判吏部南曹占對
詳敏仁宗以爲可用使知澤潞盧常四州廉儉自持不妄
交遊入爲開封府推官民鬻薪爲盜所奪逐之遭傷尹包
拯命笞盜公孺曰盜而傷主法不止笞執不從拯善其守
李之才字挺之青社人天聖八年進士爲人樸且率自信無
少矯厲師河南穆脩脩性莊嚴寡合雖之才亦類在訶怒
中之才事之益謹卒能受易脩受之种放放受之陳搏其
圖書象數變通之妙秦漢以來鮮有知者之才初權共城
令時邵雍居憂于蘇門山百源之上布裘蔬食躬爨以養
父之才叩門來謁勞苦之曰好學篤志果何似雍曰簡策

之外未嘗有適也之才曰君非迹簡策者其如物理之學何他日又曰物理之學學矣不有性命之學乎雍再拜願受業於是先示之以陸淳春秋意欲以春秋表儀五經既可語五經大旨則授易而終焉之才器大難乎識者棲遲久不調石延年日時不足以容君蓋不棄之隱居再調孟州司法叅軍尹洙以書薦於中書舍人葉道卿因石延年致之曰孟州司法叅軍李之才年三十九能爲古文章語直意遂不肆不窘固足以蹈及前輩非洙所敢品目而安於卑位無仕進意人罕知之其才又達世務使少用於世必過人遠甚恨其貧不能決其歸心知之者當共成之延年復書曰今業文好古之士至鮮且不張苟遺若人其學益衰矣延年素不喜謁貴仕凡四五至道卿門通其書乃已

澤州府志

卷之三十三

宦蹟

十三

道卿薦之遂得應銓改大理寺丞爲緱氏令未行會延年與直學士吳遵路調兵河東辟之才爲澤州簽署判官澤人劉義叟從受曆法世稱義叟法遠出古今上有楊雄張衡所未喻者實之才授之在澤轉殿中丞丁母憂甫除喪暴卒於懷州官舍慶曆五年二月也歸葬青社邵雍表其墓有曰求於天下得聞道之君子李公以師焉按之才宦蹟無幾其局器學品受授淵源不可不知故載史傳備著之

呂大忠字進伯大防兄藍田人登第後爲華陰尉嘉祐中任晉城令剛毅質直爲治有聲嘗與契丹議邊地獨持體以理折之進寶文閣待制知秦州時馬涓以進士舉首入幕府自稱狀元大忠謂曰狀元云者及第未除官之稱也既

爲判官則不可今科舉之習旣無用脩身爲己之學不可不勉又教以臨政治民之要消自以爲得師焉謝良佐教授州學大忠每過之聽講論語必正襟歛容曰聖人言行在焉吾不敢不肅紹聖二年加寶文閣直學士元祐時與章淳曾布不合降待制致仕卒詔復學士官

李用和字審禮杭州人章懿皇太后弟仁宗時授寧州刺史歷遷澤州團練舊制刺史以上所賜公使錢得私入而用和悉爲軍費累兼侍中卒贈太師隴西郡王諡恭懿

程顥字伯淳由中山博野徙河南宋治平四年爲晉城令在縣三年去之日民哭聲振野嘗曰縣之政可達于天下一邑者天下之式也座右書視民如傷四字云某每日常有媿於此民有事至縣者必告以孝弟忠信入所以事其父

澤州府志

卷之三十三

宦蹟

古

兄出所以事其長上度鄉村遠近爲伍保使之力役相助患難相卹而姦僞亦無所容凡孤寡殘廢者責之親戚鄉黨使無失所行旅出於其塗者疾病皆有所養設鄉校四十餘所時親至召父老與之語兒童所讀書親爲正句讀教者不善則爲易置擇子弟之秀者復聚而教之鄉民爲社會爲之立科條旌別善惡使有勸有耻乘農隙講武事一時義勇咸爲精兵可用庫有濩納錢數百千嘗借以補助民力爭訟者或不持牒徑至庭下陳白與之從容告語開釋之縣有稅粟例移近邊載往則道遠就糴則價高民以爲苦顥擇富而可任者預使貯粟於所以待費大省有富民張父死且有老叟踵門曰我汝父也子驚疑莫測相與詣縣叟曰身爲醫遠出治疾而妻生子貧不能養以與

張顥質其驗取懷中一書進其所記曰某年月日抱兒與張三翁家顥問張是時才四十安得有翁稱叟駭謝去晉城十年後劉立之來爲令見民有聚口衆而不析異者問其所以曰守程公之化也熙寧初用呂公著薦爲監察御史裏行哲宗初召爲宗正丞文彥博題其墓曰明道先生嘉定十三年諡純公

吳中復字仲庶永興人進士及第知峨眉縣孫并薦爲御史初不識面或問之曰昔人耻爲呈身御史今置有識面臺官耶擢天章閣待制知澤州移河東轉運使進龍圖閣直學士熙寧中卒

劉兼濟祥符人爲襄州兵馬監押徙晉絳澤潞都巡檢使歲饑太行多盜禽二百餘人民賴以安

澤州府志

卷之三十三

宦蹟

五

王仲寶高密人爲右班殿直善捕盜爲六州軍巡檢一日夜有盜叩門乞降左右欲殺之爲首功仲寶不可納舍中使寢又河北盜百餘仲寶詔出隸軍籍奏以自隨徙澤潞晉絳慈隰威勝軍巡檢使至官才八日獲太行宿賊八十人累賜金帛緡錢後徙環慶路總管兼本路經略范仲淹以仲寶武幹未衰奏留慶州

李景章平順人徽宗崇寧間知澤州才識卓越善政宜人民咸德之

陳安石字子堅河陽人爲河東都轉運使謂其僚曰興事當有漸急則擾乃出鹽付民而俾之券使隨所得貿易鬻畢而歸券私販爲減

郭忠孝字立之河南人宣和間爲河東路提舉解梁猗氏與

河東接壤盜販鹽者數百爲羣歲起大獄轉相告引抵罪者忠孝止治其首餘悉寬貸宰相王黼怒之坐廢格鹽法免

時敦彭門人宣和中爲澤州判官政事詞翰推重一時民咸有去後之思

高世由澤州刺史靖康元年金人犯澤州之高平世由往犒之乃去三月加世由直龍圖閣賞城守之勞十月丙辰金人攻澤州世由以城降金以爲西京留守時京西北兵馬副鈐轄爲陝西宣撫司前軍統制翟興與其弟進提步卒數百卷甲夜趨洛陽擒世由等斬之

姚古靖康間軍于懷澤會金人入侵古遣王德謀之斬一首而還古曰能復往乎德從十六騎徑入隆德府治執僞守

澤州府志

卷之三十三

宦蹟

去

姚太師左右驚擾德手殺數千百人衆愕眙莫能前古械姚獻于朝欽宗問狀姚曰臣就縛時止見一夜又耳時遂呼德爲王夜叉

王士言武舉進士累立戰功西北服其威名宣和初擢河東廉訪使者方臘爲寇詔擇材略之士馮熙載荐爲東南第一將首解嘉興之圍靖康元年詔以浙西兵往河東防秋會金人粘沒喝攻澤州畢力守禦金兵日增士言分必死他將力屈城西南遂陷士言乃使親卒持劍歸報巷戰而死康先之上其事贈拱衛大夫忠州團練使官其後五人翟興字公祥河南伊陽人少以勇聞劇賊王伸起興與弟進應募擊賊號大翟小翟高宗時授河東北路兵馬使徧檄山砦由是汾澤潞懷衛開山砦首領皆應命金人入陝右

興遣將邀擊俘五十餘人又遣子崧生擒金河東都統保骨遂復陽城縣乘勝取絳之垣曲進至米糧川

金左秘薊州人太師企弓之子皇統初知澤州爲政不嚴而治刑獄猥積決遣無留停平南山之盜革守城繁役秋糧請折米代粟費甚省在任三年清儉自處吏民畏而愛之許安仁字子靜獻州交河人幼孤能自刻苦讀書善屬文世宗大定七年登進士第徙翰林脩撰同知制誥朝議以流人實邊安仁言昔漢有募民實邊之議今使被刑之徒寒餓困苦無聊之心靡所顧藉與古之募民實塞不同非所宜行上然之明昌中官左補闕諫幸金蓮川疏奏罷幸出爲澤州刺史作無隱論上之凡十篇日本朝情欲養心田獵公道養源冗官育材限田理材在郡二年多善政尋拜

澤州府志

卷之三十三

宦蹟

七

汾陽軍節度使致仕安仁質實無華澹然有古君子風泰和五年卒諡文簡

李仲畧晏子字簡之高平人大定十九年進士調五臺縣主簿遷晉城令除翰林脩撰權領左司未幾轉員外郎以親老病求侍特授澤州刺史以便祿養值歲歉發倉賑濟自劾以聞上嘉之賜敕獎慰先是晏領沁南節度使澤於懷爲支郡父子相繼鄉人榮之仲畧性豪邁有父風臨事明敏無留滯故所任以幹濟稱

楊庭秀字德懋華州人大定中進士泰和初自獻州刺史移刺澤州政平訟理民用康乂雅善文詞註程楊易傳行于世致仕後閒居鄉里自號虎峰居士

王珍澤州太守宣宗興定間珍以城降于元

元任尚志壺關人歸木華黎爲澤潞節度使與金人戰有功
金人擒其長子誘降志曰我爲大帥豈愛一子竟射殺之
後以事赴徵道經武安被金人害次子存亦與金戰死
王玉趙州晉寧人長身駢脅力甚猛金季爲萬戶鎮趙州元
木華黎下中原玉率衆附之領本部軍從攻澤潞諸州時
號長漢萬戶助元戰攻殄滅城邑
石抹孛迭兒授左監軍從木華黎定澤潞諸州木華黎陟孛
迭兒爲龍虎衛上將軍

段直晉城人元初命將畧地晉城直以其衆降遂命直爲澤
州長官澤民多避兵未還者直命籍其田廬於親戚隣人
之戶且約曰俟業至至當析而歸之逃民間之多來還者
命歸其田廬如約民得安業素無產者則出粟賑之爲他

澤州府志

卷之三十三

宦蹟

十六

郡所俘掠者出財購之以兵死而暴露者收而瘞之未幾
澤爲樂土大脩孔子廟割田千畝置書萬卷迺李俊民爲
師以教鄉人不五六年士子以通經被選者百二十二人
在官二十年多惠政特命提舉本州學校事未拜而卒
任立授潞州長官後歷澤州尹遷陳州

普顏帖木兒一名不花至正間爲澤州達魯花赤兼諸軍粵
魯事勸課農桑作興學校嚴信牌辨冤獄暇時教民以孝
弟節義民多感悅

關保河南人至正間以裨將調禦澤潞與招討萬戶虎林赤
展築城垣并力守禦盜據澤及高平保旣整兵勦絕復列
兵守諸隘口民賴以寧繼有杏城盜首劉子才約侵澤潞
保又整兵以禦直抵杏城勦之僵尸百里蹂躪殆盡功聞

進保侍郎虎爲理鄉仍賜龍衣金幣有差凱旋值旱蝗秋復大水禱諸山川百神歉歲俄轉爲豐州人咸喜尋以攻汴功冠諸郡加山東樞判同僉院累贈級左轄

葉企顏上蔡人至正間以統軍元帥知翼城縣事擢知澤州撫育民生惠澤遠被嘗作居官箴建碑以自勗興學造士綽有政聲

宋景初高平人初爲平原教授以經術訓諸生風化大振陞晉城令治奸辨誣政聲四達時稱循吏後家居七年朝論高之擢史館編脩遷諭德

明李祥湖廣人洪武初以人材知澤州時干戈甫定城郭蕭然乃建州治脩學校屢興大役民不稱勞招集流離延師訓士民漸復業時號廉能太守

澤州府志

卷之三十三

宦蹟

九

王堅福州人洪武間以人才知澤州蒞事勤慎化民有方興學校以培士習州人稱之

鄭可權睢州人洪武間任澤州學正文采風流聲稱藉藉曾兩主山西鄉試

甯靖湯陰人成化間舉人以蘇州推官遷澤州愷悌慈祥清慎可法民有訟者必石復譬喻使之自改不輕笞一人嘗需菜和藥民有獻者乃厚償之其廉介多類此

陸偉字仲奇錢塘人成化乙酉鄉薦知澤州值歲大飢請發帑賑卹全活者甚衆州多宗室勢暴橫有和買併吞之害祿給不時州守必得奇辱偉皆力抗不撓坐是誣奏他事詔使來獻民衆號冤得白寧山衛軍民雜處久不靖懾以德威遂寧帖嘗謂明道先生非循吏之比特新其廟貌以

崇祀典尋致仕歸卒年八十九

李智曹縣人家宰秉子弘治間以舉人知澤州廉勤公恕擢
暴扶良聲名藉甚士民思之

馬汝驥字仲房綏德人正德十二年進士官庶常武宗南巡
上疏極諫跪闕下五日受杖降知澤州時宗室暴橫屢裁
以法王以書來請投置櫝中比事釋王遣使來謝乃於櫝
取還原書實未嘗啟也王自是弗復私請陵川有貪令巡
按御史曲庇之不聽竟褫其官嘉靖初復還職去任州民
攀轅宗室亦祖帳郊門外遷侍讀學士卒贈尙書諡文簡
崔哲遼陽人正德間以進士知澤州毀淫祠廣儲蓄尤愛獎
進後學課試皆有程期

王健永平人正德間知澤州革除宿弊聽訟公平明恕決斷
澤州府志
卷之三十三 宦蹟
如流未嘗壅滯人服其敏

王朝雍朝邑人嘉靖間舉人以嚴州推官擢知澤州存心寬
厚政理訟平歷三載人蒙其惠適巨寇陳卿據青羊山反
援兵征勦陷城中凡二十七日諭以禍福順逆之理賊衆
屈服竟勦平之百姓安堵陞懷慶同知

顧顯仁字體菴武進人隆慶初以進士知澤州爲政明敏甫
入境卽繕完城郭臺堡繼復建樓於北城始郡城東西南
皆有樓獨城北闕如顯仁曰北方面元首也獨無樓可乎乃
建北樓又勤訓練廣積貯均徭役民困蘇而防禦亦備復
念諸生或無資膏火者於社倉外買山場田廬園地各幾
區有租有課俾掌教得時其出納而周給之州舊無志乃
廣稽博訪哀然成書來者多所據依以資考鏡其勇于任

事類如此

許維新堂邑人萬曆間知澤州衣大布之衣食藜藿之食出外不設騶御戴星坐堂爭訟者片言判析賑荒療疫流民願受廩焉暇日引諸生童子說書脩程伯子遺事由是群知嚮學翟學程王允成諸賢其選也去之日士民老幼攀號三日始得出境官終戶部侍郎

賀盛瑞獲嘉人萬曆間以進士官工曹爲內監中傷出備兵鄜延降知澤州樸誠清正不畏疆禦在官之日興學校以鼓士氣減稅糧以蘇民困脩城郭以備禦防省繁費以貯財用獎節義以厚風俗凡民社大典弗辭勞怨必盡其心乃已惜以疾歸士民思之爲立祠以祀

傅淑訓孝感進士萬曆間任澤州志潔行芳有功郡乘尋遷

澤州府志

卷之三十三

宦蹟

廿一

員外郎出知平陽府遷按察司僉事以卓異調晉省學使王所用字賓吾河內人萬曆末自福寧調澤州澤俗剛悍治當尙猛所用獨馭以寬豪強者初易視之久悉馴服聽訟時恣民所欲陳旣而爲說利害如鄉三老聚鷄黍爲居其間者惻隱之心可掬以示人民無良猾輒相率和解以去州有大獄張自安等二十餘人已定擬矣廉其寃力爲昭雪得白十二三庾死配以下減者復無筭又葺張公書院建東西齋集士子肄業其中復以時察其勤惰加獎激後陞任去士民爲生祠以祀之

宗思涇陽人萬曆間以貢士授澤州學正饜使者謁廟零雨霑衣將拜於堂上思抗聲曰拜下禮也御史竦然復位課諸生勤敏有法度泮水宮墻歲時次第脩舉後遷肅府教

授王以師禮事之

王孕長澤州守北直吳橋縣人崇禎四年來守澤值流寇徧掠四境乃備戰守計日夜禦敵時寇自關陝渡黃河入晉長驅千里連陷多邑殺人盈野風鶴皆驚澤故無兵卽衛署亦僅存空籍秉鉞者鞭長莫及監司者空拳莫奮二二弁流尾賊而不見賊驚賊而不殺賊援兵絕望獨剩孤城大鎮累屠烟寒萬井守躬率宗紳士庶經營城守規畫詳明舉夫搜奸宄卹戍士慎刁斗嚴偵探皆確有成算如招集健兒則偵防有人設四鄉練營則郊圻生色創新營千兵則追賊大戰積勞成病仍支床城上部署惟勤旣而賊去兵來中貴總戎接踵而至索餉如虎毒害如狼其視州牧不啻几上肉守妙有窾會俾均爲我援守之用不令怒

澤州府志

卷之三十三

宦蹟

廿三

亦不令喜事以濟而軍以行雖所費不貲皆宗紳士庶捐於常賦之外者四載拮据十七禦寇遷河南郡守去嘗作愛錢歌揭示通衢曰非我不愛錢我愛誰不愛敲骨吸人髓天理良心壞逼人賣田產把來我置蓋逼人鬻妻孥把來我養賴逼人借銀錢把來我放債人哭我歡喜有些不痛快我見愛錢人當身遭禍害又見愛錢人子孫爲乞丐空落愛錢名唾罵千年在我有愛錢方人已兩無害少吃一隻鷄可買五日菜少穿一尺紬舉家有鋪戴儉用勝貪圖吾鼎尤當愛不事脩飾而言絕痛切販夫餅婦皆爲感動後以河南憲副死闖難澤人至今肖像祀之

黃圖昌字九如山東沂州人崇禎間以進士知澤州徵收賦役有以羨投者榜示之悉抵次限正供性重儒術課士論

文輒娓娓不倦城之東南隅爲建奎星樓庚午秋州獲雋五人元亦出于屬縣論者咸歸功焉尋以艱去任士民泣送百餘里相傳爲明三百年第一賢守云

徐芳字仙光南城進士生有異骨爲文特創闢不同于人人亦無能同之知澤州明敏惠愛才士以經其月旦評爲幸時乃父迎養官舍每於治事堂後聞芳聽訟合宜則喜或有不當卽譙讓弗恕芳跪受教以是臨政益慎事事得情甫一載以艱歸士民如失父母甲申變後棄家遠遊以緇衣終著懸榻集

國朝袁仲選遼東人順治七年以貢士知澤州姜逆大同之變州城爲賊據聞大兵將臨遁去仲選單車蒞任招集流亡閭井始晏然北累及州人議欲殲雍之仲選哀請再

澤州府志

卷之三十三

宦蹟

三

四明其無辜請以百口保冒亦立救王者曉澤人曰吾以爾使君免爾死爾其服使君教以無忘朝廷之德澤人歡呼曰不敢忘由是家奉救民牌朝夕跪起遂釀錢建廟顏日報恩未幾遷知潞安府士庶攀號莫及復立堆金會爲五月饗賽資凡五晝夜男女絡繹拜堦下今廟祀垂百年久而弗替云

官于宣字雪眉性廉潔到官携一二蒼頭入城放衙後惟與仁賢相對絕去崖角若于詩文外冀分顏色又不可得也嘗云爲政當察理驗情若參以己意人言便生障閼故訟庭每得簡靜之樂兩造赴審從弗遣人入鄉僚屬亦無敢輕受一詞者會軍興行間架稅調劑得中民便之更創設提調以司四門尋以撫提構怨牽連罷官莫不冤惜後立

祠郊南置田供祀

陶自悅常州進士康熙間出知澤州能文章脩輯州志簡而能該其遺事較舊時特詳歲款酌量出長平米通濟治多淹樞勒墓之俗逢旱有惡習將新產婦人指爲旱婆用水澆潑致傷身命者申請定罪勒石永禁時州因鹽梟生事後議加弁兵自悅力陳不便事遂寢以疾告休從祀名宦佟國瓏鑲白旗人康熙五十一年任澤州政尚寬和與民相安凡州治營建無不脩舉甃城郭濬城隍經理三門月城起城北樓期年而功成與僚佐紳士宴飲憑眺以樂之在任凡八年初踰年國瓏將以呈誤去民攀留上請復得任劉毓岳河南商邱人澤州知州蒞事有斷制治疲俗而行之以剛決妖巫煽惑幾成擾攘計擒之伏辜間并帖然正升

澤州府志

卷之三十三

宦蹟

廿四

州爲府時以其才

特簡卽以知州受任建普濟堂有續州志四冊今爲河東觀察

許口熾海陽進士由解州刺史移署澤州府事性慷慨能負荷任僅二載許而於治所公事多爲經久不弊之計事至力任不避艱難煩苦卒成其美而後已如建鳳臺縣署移關侯廟建春秋閣立社會以招徠商賈等其才足幹濟其心實公直而不撓士民及今猶能道其已事焉殫心欲續郡志惜未成去去之日民庶遮道壺漿百里燈火直接高平漏下三鼓尙不止蕭然囊橐未達省資斧竭更假貸得還京師今官侍御出爲泉州知府

高平縣

唐李陽冰字少溫趙郡人乾元間令善休養有惠政性明敏事至談笑處之無艱鉅也博學善書尤工篆隸時號筆虎郝福貞元間令才高事練遭荒歉移粟分給無弗徧罷不急之征出身任咎流亡以此盡復

明濟平原人貞元初由屯留令調高平富文學有清節敏於吏事時邑經改置苦水遠不易得濟度丹河形勢導民引丹水遶城隅所謂家涵池沼徑滿菱蕖又築隄立祠民大便之

宋楊咸弼開寶間令嚴明果斷每抑挫豪右申理屈滯講求屯田法力行開墾公私咸賴

義甫慶曆間令勤慎嚴明庶事畢舉賑卹公溥民免流亡兩澤州府志

卷之三十三

宦蹟

廿五

僉徭役多所裁省時推良吏

金王庭直天眷間令時盜賊充斥旁邑多陷繕城禦寇卒賴以安掩長平坑遺骼澤及枯骨自爲記

劉敏行平州人天會三年進士除太子校書郎轉令高平城圯盜橫掠幾不能禦敏行出已俸率僚吏助貲完城垣集二千人版築民踴躍從事城成鄉村百姓入保賊至不能犯累遷河東路轉運使

察剗吾歌泰和間以安遠大將軍行高平令和易不苛又善斷毛細必舉奸暴得不肆久而自馴遠近安之

元劉好德崞州人至元間令有理劇才勤於勸農舉廢墜招流亡重建廟學正祀考日理學校而飭振從宜招遺黎而撫安復業創興黌宮以惇俗導民蓋得爲政之先務者

郭質真定人泰和間令蒞任以扶持善類懲治豪暴爲首務復程明道鄉校七十餘所滿縣絃歌築堤障水植柳於上以蔭行路至今號郭公林立祠祀之

許安仁字子靜明昌四年爲澤州刺史前曾爲高平令

明李希文寧州人永樂間高平丞以廉勤著嘗祛虎患民德之陞福建市泊提舉副使

潘珪洪武間縣丞邑之建置多珪所創立民咸利賴是亦不苟於其職者

李真武城人景泰間以吏員知縣事廉介有爲均賦役以恤民隱建倉廩以廣儲蓄開闢曠土清理訟牘既去而民思之

杜敷字致道壺關人舉元鄉試第一除高平教諭遷壽州學

澤州府志

卷之三十三

官蹟

其

正歸家教授通易書詩三經明太祖立四輔官戶部尙書范敏薦耆儒杜敷等召至以敷爲夏官兼太子賓客位侯伯都督之次屢賜勅諭隆以坐論之禮命協贊政事均調四時

牛勃容城舉人成化間知縣撫愛民生安養休息自奉甚薄廉而有能

張晟安邱進士成化時令簡易鎮靜不事表暴俗靡音樂能以禮匡正下令禁止四境肅清嚴淫祀停襍役民服其化而安其生後擢御史

毛忠掖縣舉人弘治間知縣時大荒後民力彫瘵悉心撫字雖多建置絕不擾民事舉而境安肅政教重文學士多向風

楊子器慈谿進士弘治間知縣嚴重有威望破奸胥不法吏不敢犯時詔遷民兵實邊抗言不便事遂得已撤淫祀禁喪葬用浮屠有騾夫殺賈人攫金去其父誣逆旅主人力察其冤密訪得其實寘盜及同謀者以律踵明道先生設鄉校法凡七十所引士人習讀其中與之說經書多興起者勅脩邑乘王文成守仁爲之序并及其善政僕曾於在任時納賄知而痛懲之不以去官恕也越十八年民請立祠於程純公所創文廟之東廡安陽崔銑有記累官河南布政司

楊恭永清人弘治間進士來知高平博學有器量守正不阿且寬和豈弟未幾卒于官邑人痛之

柳豸睢州人進士弘治間以御史降知高平剛果有爲吏民澤州府志

卷之三十三

宦蹟

廿七

畏服

劉經正德間知縣心恕政平邑事振舉興學造士有功文教史章正德間高平學教諭博學有文訓士勤篤嚴肅學者多所成就

董琦陽信人進士正德間知縣有吏才練習民事每巡行阡陌察其勤惰而董戒之或耕歛不足輒給之又爲定婚儀

品節以止奢靡至今遵守當時民謠曰前有楊父後有董母以配楊子器也

龔進高安進士正德間知縣政平訟理令行禁止法在必行

兒童僕妾皆以神明稱後擢刑曹去

王準儀衛司人嘉靖間以進士知高平蠲不急之務罷無名之征扶寡植弱拯民疾苦嚴禁侵漁豪右歛手三年以治

行徵去之日貧不能治喪

孫應奎字文宿洛陽人正德進士嘉靖中官戶科給事同官王準嘗劾張璉桂萼計典謫典史應奎言吏部尙書汪鉉陰爲璉萼乞復官而責鉉王瓊代鉉亦言準宜黜乃謫應奎高平縣丞到官恤民造士邑多感戴之後仕至戶部尙書致仕卒

管律滋陽人進士嘉靖間以刑科給事謫長垣丞遷高平令政令精明文藻煥發以計典去位公論惜焉

劉鳳池渭南人進士嘉靖間任慈祥慷慨善政宜民工詩文善談兵當道薦其才擢兵曹

劉大實淄川人進士嘉靖間任明而不苛廉而不劌時有邊警率民守備號令嚴明城卒賴以安固擢吏曹民立祠祀

澤州府志

卷之三十三

宦蹟

廿

之

黃作孚卽墨進士正德間知縣有廉平名守正不撓竟以觸逆奄劉瑾去位清議重之

俞觀嘉靖間知縣政體寬平民無冤抑卒于官貧無以殮百姓傷悼

楊時泰嘉靖間知縣剛柔兼濟吏民胥服有古長者風

楊順嘉靖間知縣持已廉平蒞事明敏百度具舉政治民安韓朝江嘉靖間知縣政簡刑寬諸所措置以愛民爲本民多戴德

衛東吳嘉靖間知縣清夷簡重蒞政和平課士惠民各得其道聞父憂不再宿而去

張紹芳嘉靖間教諭負經濟才教學課行咸有矩矱居官四

載澹泊自安絕不受饋遺

張鹵儀封人進士嘉靖間知縣性明敏案無留牘訟無冤民蒞任三載百廢具舉其規爲後令悉遵而弗改擢禮科給事民祠祀之

李楨慶陽人進士隆慶間知縣視民如子治邑如家旣廉且慈擢御史去任遺澤在人久而弗諼民立祠祀官至兵部侍郎

劉一相長山人神廟時以進士知高平政適寬嚴學綜經史文章吏治推重一時擢南京吏科給事民立祠祀

馬從龍安邱人進士神廟時知縣秉心誠實律已清嚴二年報最擢南京吏科給事民立祠祀

王省身西華進士神廟時縣令有才識其於煩劇迎刃而解

澤州府志

卷之三十三

宦蹟

廿九

而氣度又極和平擢刑曹民立祠祀

任大僚高陵進士神廟時由襄垣調繁高平識精才敏嚴以馭下一時豪吏強宗莫不畏憚豁牛氏異冤有神君之稱卒官邑人建祠祀之

田景新思南人進士泰昌間知縣寬平簡易革驛遞之累減租賦之美未久調繁陽曲去後擢御史民立祠祀

王漢掖縣人進士崇禎間令居官嚴毅果斷不數月摘發奸暴殆盡安良造士民咸德之調河內百姓攀留累日不得前由御史晉河南巡撫征永城叛賊劉超稱殉節名臣楊性魯神廟時高平令識見精明才猷敏達臨民馭衆游刃有餘

暢應登崇禎間令老成歷練廉潔勤敏懲剔胥蠹不避權勢

一境肅然

魯光國崇禎間令精敏剛果有平徇之功又流寇侵境具備戰守計靡不周悉民恃以無恐

張書紳崇禎間教諭恬靜有守剛毅有爲恩義兼盡士林悅服

王繼祖岢嵐舉人崇禎間教諭立心正大待士謙和捐清俸脩學宮青氊中表表自見者

國朝劉廣國湖廣潛江人順治九年以進士知高平縣高平雖壯縣時彫瘵特甚廣國至禁耗羨除贖緩以潔清自勵又首革賠補搜索諸弊正供外不費民一錢澤所隸縣例貢紬數殊夥納費不貲力請直指獲

題請減至於脩學宮勸農桑循聲茂績報最第一聞母訃卽

澤州府志

卷之三十三

宦蹟

三

日離署就道百姓哭留遮道云方寸已亂片刻難羈寄語父老各宜自愛

范繩祖遼東貢士順治間知縣廉直剛斷能任大事察地方利害興除之首均丁戶徭役以平革蠹胥吏以清案牘葺廟學繕城垣築河隄創祠脩署一切大工無不脩舉治行爲一時之最

劉璟固安拔貢順治中任有幹才除驛遞鋪設鹽政三大弊立法垂久民甚便之警刁訟尙節儉勸農養士至催科終歲不加鞭笞而民輸恐後報最遷寧州知州士民立祠以祀

白良玉四川梓潼人康熙六年以舉人來知縣事廉直孤行一意食指數口儉若單寒殊有特操本邑正供耗羨舊規

浸及半良玉秒忽不多取櫃書有貼備例里斂百金嚴禁之機戶受價織造官絀每多蝕尅又須由潞覈驗費不貲良玉核發正價且請徑由縣解部機戶以甦驛馬草豆向令牙行辦理良玉檄委兩丞於秋冬平價採買民不爲病舊俗訟負者繳贖緩和者納息穀一切除之又禁掩柩藏窀穸者凡一萬五千有奇高平人嘗集其治行勒諸石八年行取入都貧不能舉火官衙物籍記以待後人不携一物自隨比至京歿高平之列於朝者醜錢以贖乃克殮嗣子扶柩返蜀道出高平遠近哭奠累月不止復賻贈以行梅建字啖熊貴州普定人康熙年以舉人知高平性廉介精於吏治發奸摘伏不少爽建宗程書院集雋異課其中時時授以文義又立義學俾窶人子胥得誦詩書解組去民

澤州府志

卷之三十三

宦蹟

三

祠祀之

楊呈藻愛養窮黎優禮學校半載以艱去士民惋惜

劉佐世曲沃人康熙四年任教諭課督嚴明鼓勵不倦經其指授悉魁傑上材在任脩尊經閣敬一亭及左右齋廊煥然整飭後登進士以霍邱令卒於家邑弟子思慕不忘私謚文肅先生諸生六十餘人親至曲沃立碑塚上哭奠而歸

張泗源臨潼人進士康熙十四年任貌言古樸治理淳和視若迂拙者而不動聲色擒捕巨盜五六十人親臨斬決內文明而外柔順其鎮靜有遠識焉

李鈺康熙間任潔已愛民歲饑分厰散米民慶更生蝗蝻害稼出粟勸捕稼不爲災忽而食禾殆盡鈺糴菽散種民卒

賴有秋

高純治康熙間任催科有方民不煩擾懲奸戢盜閭里宴然
惜未久卒於官

甘士瑛雍正間任居心廉慎政治和平官民相得如家人父
子

澤州府志

卷之三十三

宦蹟

三

陽城縣

隋張虔雄開府虔威弟有才幹秦孝王俊選爲法曹叅軍王嘗親按囚徒虔雄誤不持狀口對百餘人皆盡事情後爲陽城令有治績時稱循吏

宋張之才字次文遼人紹聖初縣令清謹愛民時稱良吏去官日有辭湯廟詩云一官來此四經春不愧蒼天不負民神道有靈應信我去時猶似到時貧邑人温光刻石頌之以爲行不愧言云

陸餘慶吳郡人慶曆初縣尉有政聲時靈勝二州黨項爲寇詔餘慶諭以恩信寇率衆歸附民咸服其德威所致子璩爲河內守亦有異績封平恩縣男

金張恪開封人大定中縣尹慕蓋公之清靜以經術爲吏治澤州府志

卷之三十三

宦蹟

三

寬嚴相濟民樂其化爲立去思碑

元李裕大德間以才能薦授縣令甫下車卽問民疾苦諭以農桑爲本衣食足而後教化可興其勤恤民隱者如此邑人德之進士張克明撰碑以紀其績焉

路有讓字文遠廣平人至治初縣令有異政凡遇有道者延禮之無告者存恤之任七載化行訟簡草滿囹圄稱爲吏治之最

韓汝弼字良輔保定人至順時爲縣尹舉廢墜汰冗食凡不急之役悉罷之時旱災禱雨立應後屢致豐年群以爲善政所感云

關世傑字英甫晉寧人至元四年由兩臺掾薦爲陽城令到官輒布以恩信推誠愛民初舊令勸課徧鄉都擾民特甚

世傑以農桑有衣食之利孰肯甘游惰而樂饑寒若乘騎從徒家呼戶召小民輟糶殮具饋餉迎勞且不暇又何暇顧其業哉此雖愛之實害之也乃于每歲農隙時但召各社長而諭之民感激益力于田昔學校多廢弛世傑延師設教學者皆聞風而起至俗有簡不率教者亦必委曲開導使之必改而後已尋憲使按部至縣上其狀爲諸邑冠趙繩祖燕山入至正十一年爲縣尹廉訪碩彥戒飭游民嘗以講明彞教爲士庶先有興學碑記

周克明字文舉清苑人至元間由侍儀吏爲陽城主簿有志操人不敢犯以非義然政尙寬簡不屑屑于煩苛瑣細之務故民奉之如慈母時有旱患禱雨輒應歲大稔民立碑頌之

澤州府志

卷之三十三

宦蹟

三四

明李芾字文輝鄧州人洪武初知縣事建壇廟脩學校勸民力穡樹桑時多創造而不病民有主簿方涓者佐芾亦以治聞祭酒宋文恪訥廟學記云俾無忘二侯之德一時吏績可謂並美矣

王珪洪武七年爲陽城知縣建養濟院惠民藥局及倉厩若干所異政頗多

劉以文黃岡人正統七年以温州府照磨擢陽城令明于政體不爲矯廉姑息歷九載治行卓然民乞留巡撫宋鑑以聞詔加爵二級及致仕民慕之不忘教諭劉潛作碑記之潛亦建藏書閣于明倫堂右

史書字獻忠靈臺進士任時年尙少大猾路省祭輕之居逼衙前會新縣門餘零木其家不問而取令巡官執以來路

至厲聲曰木無幾胡足索書曰若吏乎曰吏曰讀律乎曰熟律曰常人盜官物徒乎路默然叱隸箠殺之一縣皆驚在官勵清節再知平山以治行擢吏曹

陳寬字裕夫新河進士成化間知縣事矢志潔清門無私謁且不以持已廉有矜色尋擢監察御史累官按察使

劉一清陳州人成化間教諭曲盡教術俾士子咸趨于正稍放達不羈者輒以禮繩之越九年講授不倦時稱爲司鐸之望後陞黎城知縣

谷景通房山舉人弘治中縣令廉介自持爲政嚴于紀律無敢犯以非義者尋以杖小吏爲方伯吳所笞憤恨而卒輿論惜之

蔡深弘治間訓導勤于課士限以程法皆懋然奉爲模範焉

澤州府志

卷之三十三

宦蹟

三五

尤以曲臺禮爲禋躬之要授學者講習之至今相傳爲家法云

王傳高陵進士嘉靖初知縣事沉靜寡言笑廉潔自守居四載未嘗私取民間一物僚吏憚之至于積穀備荒興學立教士民多賴焉官至山東副使

楊縉字薦甫壽張進士嘉靖中知縣有政聲曰廉介勤慎公平明決及愛民教士之類皆以實心行之去官二十五年民思之不置會州守行縣至陽城請建祠以祀守詢其實從之初巡撫王德明署考語曰當饑饉游臻之年著撫字心勞之績雖古循良無以過眞實錄也忻州少叅潘高謨文以記之累遷湖州知府卒于官

帝文英字本和涇陽舉人嘉靖間知縣事初下車刻石城隍

廟曰太行巍巍沁水潏潏政有私枉生不還鄉其盟心自
矢如此邑人有王海者事親以孝聞好義樂施文英廉得
之勸以建鄉學立義塚脩河隄及賑饑卹貧之事不一而
足至勦賊尤有功焉出資脩築城池造諸兵器爲禦寇計
民賴以安光祿寺卿馬理記其事

盧脩可許州人嘉靖間知縣事到官年尙少令行禁止無敢
撓以法者豪右悉斂跡焉

張問仁西寧衛人嘉靖間知縣事禮賢下士吏惕民懷以治
行擢工部主事累遷昌平兵備僉事

李葦字子由內鄉進士嘉靖中檢討謫縣丞日以詩文自娛
而政事不廢陞推官至貴州提學

孫文澤鄒平人嘉靖間主簿勤慎公平廉得鹽務諸弊力爲
澤州府志

卷之三十三

宦蹟

三六

革清審編則賦役無不均者遇旱稜禱雨田禾霑足去後
民致思焉

王標壽州人嘉靖間典史蒞任甫四十日聞賊劫掠西南村
落輒率民奮擊之竟遇害百姓哀之祀名宦

王柱汝寧人嘉靖間教諭性剛嚴勤課藝士子畏服每月試
爲諸生設饌門竟日始啟校閱畢第其甲乙無不稱當士
爭自刻勵科第從茲弗祀

李樂泰安州人嘉靖間訓導謙恭樂易不責脩脯至貧士尤
恤之蓋敦厚長者也

王謨登州人嘉靖間訓導有志操恥言阿堵嘗捐捧以周寒
士卒于官士爭制服泣送之

李棟字尙隆涉縣進士隆慶間知縣御下以嚴豪猾爲之屏

息至問民疾苦與諸父老諮畫便宜顧疊疊移日不倦人以是愛而畏之邑舊無鐵稅所司歲加勾稽以爲常民大窘棟獨爭于上卒蠲其征昔戶口編力差不問腴瘠一丁不能支多跳者棟乃劑產之媿惡以均其賦徵貯于官而募給以時爲雇役之例公私便之至于弭鑛變化村盜裁里甲立社倉凡諸善政行之五年邑大治尋擢御史民立二祠祀之後官大理寺卿

張應詔字叔宣咸陽舉人萬曆間知縣事有才識到縣卽以邑城爲憂初城東西面故甃以甃南北猶覆土歲久寢頽圮會州守于達真太宰王國光謀之應詔應詔卽慨然力任于是諏日鳩工並前東西二面一撤而新之筭官錢五千餘緡而城郭完固且值歲饑民以傭活者甚衆又以士

澤州府志

卷之三十三

宦蹟

三七

子登第者類不能接武而起應詔以異爲文明象乃建二峯于城之東南自爲文記之嗣後士風大振科名日盛其言如左券云尋擢御史歷湖廣按察司僉事

王象蒙字養吾新城進士初任河內縣神宗時補授陽城天性精明而臨民持大體不以苛細爲務士向學農力田其效也旣去民思之後擢御史

劉斯濯涿州人神宗時知縣到官遇亢旱步禱卽獲雨嘗留心造士每臨講幄指授大義無倦色未一載卒于官士民惜之

熊偉商城人神宗時知縣甫數月凡強暴志寘于理由是豪右無敢犯法者尤以造士爲化民之本興行育德蔚然文教可觀焉後卒于官

劉應奇字澹如中牟進士神宗時知縣性嚴明摘發如神舊無賴子多竄入公門曰是亂政之媒也立法之所易者皆慤愿吏不敢爲蠹邑兩稅昔稱易辦適歲大祲戶有亾命遂逋欠里排豪俠詭籍爲奸貧弱者苦重刑而豪富反得脫應奇乃廉知一人大猾真重典詭寄之弊始絕又邑嘗多盜藏山谷中見民物輒被劫掠乃嚴保甲法緝捕之凡以事至公庭者籍記其姓名事發按治無漏網盜遂息至若慎徭役斥誣訟靡不明先四境帖然尋以治行擢吏曹民號泣攀留詳白尙書所知生祠記

王雅量字襟海費縣進士神宗時知縣事到官以懷保爲心務使民沾實惠初兩稅逋欠豪黠富人多連猾吏竄名下戶而追呼催比唯貧者當之正供未完民已力竭矣雅量洞知其弊乃親檢稅籍輸納不時者必重懲之又嚴禁詭寄犯者卽寘于法由是奸弊絕而民困乃得蘇後擢御史按陝西道出陽城邑人士無貴賤老幼皆爭迎道左如見慈母官終光祿寺卿

王良臣字敬吾新鄭進士神宗時知縣性沉毅有遠畧庭無滯訟雨造質成裘者裘辟者辟立柱而遣之人亦靡敢以梗陽入溷者建書院聚生徒教之所拔者皆以次得雋歲課民種柿若干株爲殿最迄今成林民食其利陞河間同知民褰衣裹糧而送者至百里外夜猶懸燈祖帳依依不忍別良臣竟割纜而去

安伸字葵明淄川進士神宗時知縣甫下車遇秋旱伸乃齋沐爲文禱雨郡神曰令有愆宜譴令移之歲民何辜且無

歲將無民無民將無令也精誠祈禱未幾而雨至民乃有秋繼興學官捐俸給士子又捐除酒稅更役銀若干且燭奸如神大豪望風而避民思愛之爲立祠擢御史

楊鎮原字仲岳陳州進士崇禎初知縣厚重少文治尙清靜與民休息及流寇前後數犯境旣擒斬渠魁九條龍又趣牛將軍襲殺賊于封頭及游擊白安于朔三日擊賊再敗之多報首功扞衛全城會大軍雲集闔人驕蹇責芻餉率取諸閭左然民子來恐後卒無怨言善人卽戎遠過武健吏若此擢戶科給事士庶感恩立祠尙書張慎言記之終河東叅議治命戒其子曰陽城我桐鄉吾死後魂魄戀此無輿櫬還也遂塋南壇側後令項龍章加封樹官備牲醴致時奠民多哭墓者

澤州府志

卷之三十三

宦蹟

三九

國朝李鴻勳字常六磁州進士順治初知縣敏斷有才畧蝗入境齋沐虔禱蝗相抱僵死民以爲精誠所感

李繼白字夢沙臨漳人順治中知縣廉慈敏練絕苞苴平訟獄以及造士敦農諸善政深入民心其大者尤在除荒地之稅以甦民困初陽城遭闖賊之蹂躪屋廬非舊丁口供億者不過二萬餘其東道諸鎮稍見蕃衍如西南山一帶民居寥寥煙火行竟日不見村舍以故闖里不過百餘丁更有一里一人供役數年不節息者繼白日擊其困乃詳聞上憲爲民請命疏上免荒地若干頃民感其德爲立石以頌之

陳懷道字士林諸暨人順治中典史時亢旱虔心拜禱長途烈日不惜頂踵已而雨至歲大稔民深德之

陳國軫號鹿屏金壇副貢順治間任清慎慈祥愛民而下士
葺學宮培地脈城道路纂邑乘立陽陵社以造多士陞知
太倉州蕭然就道有古琴鶴遺風民爲立沒世永思碑
李銘珮字德英金壇人順治間知縣治尙清靜偶以註誤落
職抑鬱而卒都人士咸哀之爲治舍襚辦旅櫬歸日送之
東郭多有雪涕者

鄭天眷石樓人順治中教諭溫恭渾穆舉動皆中禮法而惡
衣菲食不苟言笑士咸愛慕去之日傾庠祖餞繾綣不忍
舍去

都甫字平倩延津進士康熙間知縣志尙廉潔政寬平歷官
十二載熟諳風土視百姓如家人人卒無敢欺者獄訟衰
息常捐資以應公事故宦久而囊橐蕭然擢御史累官通

澤州府志

卷之三十三

宦蹟

四十

政叅議

項龍章字宸錫歙縣舉人康熙中知縣簡重有才甫下車卽
以潔清誓于廟終其任不渝纂縣志清編審革陋例興學
造士不肯以傳舍視一官艱去卒於家

陵川縣

唐崔璨咸通間令勤懇愛民期月而治頌德者比之甘棠當日有禮義村瑞應事

宋董沔元豐間知縣有學識時王安石新法嚴切沔陰以寬濟民又抗疏請毀淫祠及罷一切不急之務爲時所稱

呂由庚元豐中以瀛州防禦推官知縣事教養兼行士民戶頌提刑學士黃公廉以詩寵之

金魏繼隆天會間令首重學校與主簿趙大兄計遷聖廟於城內率諸生詣學講習藝教士風翕然丕變焉

田居敬貞元間進士爲令甚嚴明刑政無苛無濫吏畏民懷士尤賴其陶鑄一時有瑞麥嘉禾之祥

元張黼銅鞮人至正間由高平諭陞陵川尹時破頭潘先生澤州府志

卷之三十三

宦蹟

四一

自鄴攻潼關兵臨城扞衛力盡不屈死

明王憲鄆縣人宣德初知縣性安和政尚寬大凡鞠獄察其辭屈薄懲之復委曲導以改過民感激皆爲善良恥以險訟爲倖庭堪羅雀竟有刑措之風焉去官老幼送之相望于道

任通易州舉人景泰間知縣勤于爲政視官事如家事百廢以次脩舉民被其惠累世不忘時稱古之遺愛焉

任玉鄭州人成化間縣丞廉明正直常自言曰不敢求安以病民其矢志如此卒于官民痛惜之

孫磐遠東進士弘治間任爲政務在抑豪強恤孤弱使貧富大小各得其所先是坊廂人役下鄉拘攝小民不勝其害乃出令嚴禁之民不爲擾各里桑園久湮沒躬督民勤力

布種利始不棄于地又設法措置雜糧十萬石以賑凶荒所全活者甚多至於彈盜賊均徭役息獄訟諸善政不一而足尤勤于造士以學校設科乏人親率諸生朝夕課之鄉舉二人皆名雋鄉立社學童子就業者三千有奇親集養正編並小學四書養蒙大訓使之誦習俗佞佛又著僧辨學辨力排之歷二載以艱去士民遮道挽留不可得爲立去思碑頌之

楊璽禹城舉人弘治間知縣誠心撫字緩催科民無追呼之擾邑有興作不肯輕用民力凡可得已者悉免其役時有慈母之頌

劉廷儀慈谿進士嘉靖間任強毅公正不阿上官以廉儉約已興學校陶鑄人材彬彬有造有德邑多盜出幹役擒捕

澤州府志

卷之三十三

宦蹟

四二

之無漏網四境帖然士民咸賴焉尋擢御史

袁淮任邱進士嘉靖間知縣甫蒞任勸闢田教勤耕示之本申祖訓示之恭去貪放猾示之法祀賢廣教示之禮緩征禁索示之靜閱十年民獷變而良俗鄙變而雅善政之入人深也祭酒崔銑爲作遺愛記以誌民之不忘云

孫紹先號碧泉萊陽貢士嘉靖間任甫下車卽詢民疾苦初邑中一切費咸取辦里甲紹先悉裁之不欲腴膏脂奉一令也旣革且鐫石垂之永久邑在金元間賢豪輩出因念廟學爲育才重地遂用縉紳士議遷東城外舊址自是人文日盛頑民負官租歲以爲常乃下令示以催徵之限不假鞭箠民感德爭相輸納兩稅不逾月而立報民素苦徭重一役出中人之產破矣紹先悉知戶口單弱力爲調停

凡驛傳庫斗諸役各准丁賦劑量以爲式而小民始獲息肩之安他若墾荒蕪以贍困斃招流移以復本業敦行鄉約練習民兵諸所注措浹漑于民者甚深歷二載以飛語中傷去官民攀轅號泣不忍舍爲建生祠立德政碑以思之尙書周盤詳記其事

李麒涇州舉人嘉靖間任爲法不尙峻厲亦不爲姑息性明決勇于任事初邑城舊覆以土漸就傾頽乃鳩工甃以磚石城始完固又嘗勸農桑俾知務本無游惰以苟安者值歲歉積穀賑饑民無菜色時稱爲良牧

馬宗孝宣撫貢士隆慶初知縣爲政嚴明禁礦盜抑市豪以私干者卽寘于法雖旁門曲徑亦必杜之奸吏肅然不爲蠹而治民則濟以寬焉桑植數多者賞布絹墾田乏力者

澤州府志

卷之三十三

官蹟

四三

給耕牛丈地均糧建官脩學士民德之擢少府送者越百里

劉汝江贊皇貢士神宗時知縣御衆以寬存惻怛施惠德不欲速以見功而庶事次第舉行無廢墜初稅糧常逋欠追呼催比民甚苦之汝江但限以輸納之程令自完民果如期而至不負約舊城多圯壞池壅塞乃率民脩治之完固如金湯又均徭役僉驛傳常捐俸以濟貧不能葬者祈雨禱雪皆立應民感之尋以艱去赴上保留者幾千人

李士登洛陽進士神宗時知縣冲齡筮仕勵清廉精吏治卽老練不過也尤加意作人指授文法士多向風歷官布政許自嚴井陘人選貢神宗時任政刑清簡專尙教化時上官多以殘酷爲能自嚴獨和平寬厚不虐民以取媚歌頌久

而不衰陞臨洮通判

張堯輔宜川舉人神宗時知縣有志操通達庶績緩催科均徭役撫民如不及以治行陞灤州知州

劉本郴州人神宗時縣丞克勵官常慎于操守雖一介不敢妄取去之日行李蕭條有類寒士

馬如龍安塞人選貢神宗時知縣到官置木阜數十凡訟者受攝牘懷一阜往當攝者莫不悚然趨就訊法令之嚴如此輸爲限以漸就完毋令過苦役爲等繁簡各以力任民相勸如子來縣庭明列科條搜剔弊蠹胥吏凜若神明四封之內儉兒歛跡絕赤白丸無復鼠竊爲患聽訟以片言決兩造庭無滯案他若勸農養老及招流移備歉歲俱井然有條理尤留心造士爲國家需才之地政有餘閒輒飭

澤州府志

卷之三十三

宦蹟

四四

學宮新禮器以經義勉策諸生莫不感奮脩業期無負教育心甫三月會有中傷者去官闔邑人奔愬諸當道又數百人伏闕上書爲昭雪其冤卒獲量調郡倅士民感其德勒珉尸祝之

楊驥徵安塞人選貢崇禎間任通達治體春溫而兼秋肅並優詞賦著青霞閣草

謝志安江南人恩生崇禎間以州同署陵川縣事流寇猖獗山城危如累卵激忠義鼓人心設奇禦敵有再造功

國朝李向禹鍊嶺人順治五年以貢生知縣事己丑姜瓖變兵逼城下妻王氏曰君職守土宜竭力報國慎無以家爲念向禹領之率家僮馳出王遂用白練自縊于中堂二女暨婢從殉城陷向禹被執誘之降復怵以兵卒以不屈死

越八年後任黃國璨上其事御史以聞贈山西按察僉事
廕一子入監

黃國璨字觀虛運城人選貢順治中任招流亾勸開墾民無
力治田及貧不能婚葬者量給資助之脩聖廟設義學置
義田百畝于湯庄刻訓誡書導善惟日不足禁役吏不得
下鄉折獄明先不徇情枉法凡一切積弊悉除之士民歌
思弗忘時稱良吏之最

孫必振字卧雲諸城人戊戌進士以懷慶推官裁補陵川縣
邑中金元時士爲鼎甲者七人後寢衰殆四十年不見科
目必振至易建學廟創書院校士督課士連舉於鄉例解
黃絲黃絹祛其累省賦歸民民用以豐俗好訟豪猾蠹役
因緣爲奸痛除之訟庭閒闐民咸樂生又與脩縣乘詳而

澤州府志

卷之三十三

宦蹟

四十五

核任六載遷御史去民遮道者數百里旣去爲立祠

沁水縣

晉邵續字嗣祖魏郡安陽人性樸素有志烈元帝太興中除沁水令時天下漸亂續去縣還家糾集義兵以圖興復晉室後爲石勒所執灌園鬻菜以供衣食帝命續兄子存往拒寇勒遣石季龍攻之存戰久疲苦潰圍南奔在道爲賊所殺續竟以節死

宋楊仲元字舜明管城人第進士調宛卽主簿遷知沁水縣民持物來輸者視其價稍增之餘則下其估官有所需不强賦民聽以所有與官爲入度相當則止率常先辦河外用兵督餉轉西界夕宿洪谷口仲元相其地乃寇所由徑路亟命去之民以困乏爲辭不聽寇果夜出劫諸部沁水獨免後二十年其子過縣父老拜泣曰河西之役非公無

澤州府志

卷之三十三

宦蹟

吳

今日矣初軍期尙緩而仲元督行甚急至則芻糧有不集者皆可賤市後期者價數倍民始知其爲利州買羊歛民差出錢帛滋蔓病民爲甚乃更其令戶纔費錢百遣吏而羔於他所明年供州不科一錢仕至中散大夫卒初仲元嘗戒諸子曰吾入官五十年未嘗以私怒加人雖杖刑之微苟有兩比不敢與重法以是爲報國爾

金夾谷陞天眷中爲主簿擒賊有功邑人常文憲爲作阜山戰勝傳

元陳榮祖字敬先密縣人至正間縣令時兵戈擾攘百姓奔匿山谷中到官首以撫綏爲任布以恩信民盡復業尤加意名教增置學田若干畝士咸頌之

李鎔山東人至正中由河東運使謫主簿建石樓精舍延絳

人郭晉以道德文章倡率諸生一時士習盡彬彬有鄒魯風

明陳德鳳陽人洪武間縣丞時城垣公廨及廟學壇壝鋪舍漸有就傾之患德乃盡葺而新之縣倅所爲儼然負長吏之望

張猷揚州舉人正統間教諭通五經尤長於詩以禮教率士子雖移日無倦色憂去起除河南鎮平縣沁諸生上疏爭之不報

張昇蘄州舉人天順間知縣時學宮漫漶不脩顧而嘆曰學校爲設教之地今剝壞如此何以造士乎乃鳩工重建明倫堂增置南北號舍若干間凡未脩城池公廨鋪舍皆以次就理士庶兵弁胥賴以安

澤州府志

卷之三十三

宦蹟

四七

陳奎海門進士天順間知縣有惠政去任民致思焉陞知澤州終慶陽知府

祝祥浮梁舉人成化間御史謫知縣政聲甚著終汝寧知府狄宗文寧州舉人成化間知縣性剛介令行禁止尤留心釐剔猾吏歛手不敢爲奸政治肅然無敢玩以法者

蘇政玉田舉人成化間教諭賦性剛方不苟言笑然延接後學如不及士經其提命多斐然成章者

王輔長安人弘治間知縣秉公持法吏畏而民愛之時學宮多圯壞銳志興復比歲稔乃屬梓人度材陶人埏埴凡攻金攻石設色之工各掄選執藝事以待盡撤故宇而新之工半以憂去士咸懷之

楊範洛南舉人弘治間知縣守已介然無敢干以私者時以

循良第一歸之先是前令王輔以憂去官廟學尙未落成
範乃益求善工踵而脩之親爲指畫閱三年告成其制煥
然大備文教聿興去任士庶攀轅不舍陞眞定通判

劉錫南宮舉人正德間知縣甫任值流賊猝至孤城圯壞知
不可守乃泣涕北向再拜率民潛山谷間老幼得免血刃
吏議棄城奪官寧爲法受過蓋聞活千人者後必昌二子
果登進士

王溱開州進士正德間知縣性明達持法謹嚴初縣治毀於
兵火甫任蒞事於覆蒿下凡三月庶務以次就緒人民安
集成荷更生四遠山谷之民無不願子來以興縣治者已
而治城濬池脩學宮凡所宜舉者民皆樂趨而不知擾其
善政所感如此尋擢御史出爲平陽知府

澤州府志

卷之三十三

宦蹟

四八

王邦憲高密貢士正德間訓導性端介去之日值歲荒遺齋
俸以濟貧士有古君子風

王進賢德州舉人嘉靖間知縣有才識治行卓然猾吏側足
而民熙熙依賴焉居二載以憂卒遠近士民無不
出涕者立祠端氏鎮祀之

周詩更姓單固始舉人隆慶間知縣治尙清靜性和易見之
者如春風煦煦自奉常廉儉雅不欲以小民脂膏爲身家
計其持守如此陞戶部主事歷官雲南永昌知府

焦久生黃縣貢生神宗時知縣性明敏達于庶事且哲而能
惠常以仁民爲己任時稱豈弟君子焉甫四月以憂去民
至今思之

曲遷喬長山進士神宗時知縣推誠愛民務寬大不事苛察

獎拔才雋率多知名者陞工科給事累官順天府尹
董之表陽信舉人神宗時知縣清謹仁恕時艱多所匡救去
任童叟遮道號泣出疆二百里絡繹不絕陞晉州知州終
鞏昌同知

焦鰲遺其籍貢士崇禎間知縣流寇自晉入豫自豫返晉沁
水實當其衝鰲督士民嬰城固守力屈死之

張大爲雲南選貢澤州州同署縣事崇禎六年賊陷沁城焚
毀民居老幼逃散大爲至安集流亡脅從者悉寬赦之復
建壇以祭兵死者民心始安既而脩城垣建官舍上不費
公下不擾民

國朝尙金章儀封進士順治間知縣請兵除賊招集流亡民
獲安堵陞刑部主事

澤州府志

卷之三十三

宦蹟

四九

劉昌隆平進士順治間知縣時姜逆爲患昌率士民嬰城堅
守後賊勢愈熾力不能支不得已入河東請兵時議逃城
落職

卽潞淄川進士順治間知縣工科舉文所取皆名雋纂脩縣
志

董遂昇河間籍武進人拔貢催科不急編審惟公治尙寬平
于事無不達終漢中知府

謝允掄祁門舉人康熙間知縣寬仁長厚凡以訟至庭者懲
創之後卽加以勸諭民皆知所感而化爲善良值旱災禱
雨立應百姓樹碑紀之名喜雨亭

于繼善東阿人歲貢康熙間任寬嚴並用辛未縣遭蝗蝻請
蠲積逋及逃丁之課甫半載艱去

奚士恂錢塘人以軍功叙用縣丞爲政寬平然不以苟簡從
事務以實心行實政民被其惠又明于釐剔猾吏肅然歛
跡不敢爲蠹調成縣西和俱有惠政以裁缺告歸

趙鳳詔常州人進士康熙間知縣才守第一其實心厝注見
之文告明切周詳使言無餘意期于實用具載縣乘以薦
調繁臨汾士民攀轅不得留爲立生祠著龍岡集紀載沁
事尋陞太原知府

許補唐韓王元嘉高祖子少好學聚書至萬卷又采碑文古跡
多得異本閨門脩整有類寒素與弟靈夔甚相友愛兄弟
集見如布衣之禮其脩身潔已內外如一當代諸王莫能
及者高宗末轉澤州刺史

寧王憲睿宗子明皇之兄歷澤潞等州刺史恭謹畏慎未曾

澤州府志

卷之三十三

宦蹟

五

于議時政及與人交結

竇牟字貽周扶風平陵人爲文最長於詩孝謹厚重登進士
第歷都員外郎出爲澤州刺史卒司業其爲郎官令守慎
法寬惠不刻弟庠字胄卿累殿中侍御史遷澤州刺史兄
弟五人有聯珠集

後唐高從慶并州壽陽人累世將家戍天井關與梁軍戰死
周張承德字抱一并州陽曲人顯德初從世宗戰於高平時
宋太祖與承德各領牙兵二千承德善左射太祖與承德
厲兵分進大捷降北漢軍七千餘衆

李崇矩字守則潞州上黨人幼孤貧有至行周世宗顯德初
從征高平以功轉供備庫副使宋初征李筠率禁軍數千
人屯河陽以所部攻大會寨拔之改澤潞南面行營前軍

都監

後梁徐懷玉亳州雋夷人遷右羽林統軍屯於澤州晉人攻之爲隧以入懷玉擊之隧中晉人乃却

後唐澤州李罕之襲潞州以降梁梁遣丁會應之李嗣昭與會戰含山執其將一人斬首三千級遂取澤州

晉慕容永率衆向洛陽朱序自河陰北濟與永僞將王次等相遇乃戰於沁水次敗走斬其支將勿支首參軍趙睦江夏相桓不才追永破之於太行永歸上黨序追至上黨之白水相持二旬聞翟遠欲向金墉乃還

李筠起兵北漢主自帥兵赴筠筠言受周太祖厚恩不敢愛死北漢主不悅使盧贊監其軍聞筠與贊不協復遣衛融和解之澤州破筠死獲衛融融請死宋主怒以鐵搥擊其

澤州府志

卷之三十三

宦蹟

五一

首流血被面融呼曰臣得死所矣宋主曰忠臣也釋之以爲太府卿

董遵誨涿州范陽人周世宗北征其舅高懷德表遵誨從行師次高平與晉人遇將接戰晉兵未成列懷德命遵誨先出奇兵擊之晉人大潰宋初征李筠令遵誨從慕容延釗討之遷馬軍都軍使因留之鎮守

馬仁瑀大名夏津人周世宗北征至高平師不利諸將多引退仁瑀謂衆曰主辱臣死安用我輩乃挺身出陣遂敗北漢擢弓箭控鶴直指揮使宋太祖卽位從至澤潞以功領常州防禦使

宋向拱字星民懷州河內人周禦劉崇使監護何徽樊愛能軍世宗親征拱以精騎居陣中高平之捷以功兼義成軍

節度河東行營前軍都監宋太祖征李筠拱迎謁至汜水
言曰筠逆節久著兵力日盛陛下宜急濟河踰太行乘其
未集而誅之帝從其言筠遂見擒

康再遇河南洛陽人爲龍捷指揮使從太祖征李筠死于兵
以子保裔代職從石守信破澤州

高懷德字藏用真定常山人忠厚倜儻有武勇周世宗禦劉
崇以懷德爲先鋒都虞侯高平克捷以功遷鐵騎右廂都
指揮使領果州團練使太祖親征李筠先令懷德率所部
與石守信進攻破筠衆於州南以功遷忠武軍節度檢校
太尉累封冀國公追封渤海王

馮拯字道濟河陽人以書生謁趙普普竒其狀曰子富貴壽
考宜不下我舉進士累官權知澤州歷左僕射平章事封

澤州府志

卷之三十三

宦蹟

五

魏國公贈太師中書令諡文懿

陳彭年字永年撫州南城人雍熙二年中第累知澤州丁內
艱免歷叅知政事兵部侍郎貴至通顯無異貧約所得俸
賜惟市書籍卒贈右僕射諡文僖

呂公孺字稚卿壽州人宰相夷簡之子知澤州累戶部尙書
公孺廉儉與人交寡合談者清其節焉

張存字誠之冀州人進士累遷龍圖閣直學士知延州以母
老徙澤州仕至吏部侍郎致仕積遷尙書性孝友家居矜
莊終日危坐未嘗傾側卒諡恭安

金董師中字紹祖洛州人少敏贍好學強記擢進士調澤州
軍事判官叅知政事進尙書左丞卒諡文定公文性通達
踈財尙義平居則樂易眞率其臨事則剛決挺然不可奪

元好問曰許汾陽安仁守澤日戒子云婁相任唾面周廟貴
緘口寸陰大禹惜三命考父走河東人至今傳頌之

元張緝字士明益都膠州人性孝友能詩文至正七年領鄉
薦爲澤州儒學正轉秦州幕職棄之養親居揚州遇亂母
方卧病賊突入舉戣欲刺母緝以身蔽之中脇三日而死
明鹿久徵定興人進士爲御史時以軍政貶黜言官三十四
人久徵抗疏申救謫澤州判官遷滎澤知縣未任卒

于達真原名瑱字子冲歷城人進士李攀龍門人知澤州自
諸生時浮湛閭里習知民事爲郡精核文法洞察情僞所
興建便宜釐革弊蠹皆老吏所不能爲威惠流通上下懷
服治行第一居五年陞兵部員外仕至陝西叅政

公家臣字其甫蒙陰人進士以翰林編脩調澤州判官既至
澤州府志
卷之三十三
宦蹟
五三
日坐曹決事無少鞅鞅束帶謁大吏視諸佐史大吏咸不
自安使門下諭罷半歲遷廣平推官

明張問達字德允涇陽人進士歷知高平濰二縣有惠政徵
授給事中累吏部尙書太子太保歷更大任三案並經其
手持議平允不激不隨乞歸加少保卒贈太保

孫應奎字文宿洛陽人進士給事中屢犯權貴風節自勵因
大計事言汪鉉爲張惣桂萼脩郤謫高平縣丞累陞戶部
尙書

侯弘文高平知縣奇士也僑寓襄陽散家財募兵隨盧象升
討賊題授監紀象昇移宣大弘文率募兵至楚爲王夢尹
所陷有旨卽訊象昇上疏曰弘文義切封疆破家募兵捐
軀殺賊身罹法網臣實痛焉

國朝孟持世沂州人授貢澤州同知署陽城縣事清靜不擾而民無訟皆曰官清不可欺也白大司寇稱爲本朝陽城第一良吏作序以贈之

余元泰按郝經遺山先生墓志銘先生父格顯武將軍鳳翔路第九處正將兼行隴城令其叔父爲陵川令遂令從先生大父學中州集元氏字德明累舉不第終于家號東巖全金詩註德明名格好問不敢名父金史不爲詳著漫從中州集所載亦以字書山西舊志每有金人元格詩始知德明名格也遺山集高平道中望陵川詩註云此縣先隴城府君泰和中舊治據此好問隴城之子格累舉不第何由宰縣郝經云隨其叔又何以此云隴城府君經陵川人縱流寓四方不應失考至此今志有陵川令元泰不能詳

澤州府志

卷之三十三

宦蹟

五四

也

明周吉咸寧人舉人由中牟教諭陞沁水令會有警省令募民兵甚多力請裁其半歲旱虔禱輒得雨又賑濟善民不致重困以死顧數忤上官踰年調蘭陽治沁蘭各一年二邑人思之

田補

周馮亭韓上黨守秦白起取韓之野王上黨道絕亭與民

謀曰鄭道已絕韓必不可爲民秦兵日進韓不能應不如以上黨歸趙趙若受我秦怒必攻趙趙被兵必親韓韓趙爲一則可以當秦因使人報趙曰韓不能守上黨入之於秦其吏民皆安爲趙不欲爲秦有城市邑十七願再拜入之趙聽王所以賜吏民王大喜乃令趙勝受地告馮亭曰敝國君使勝受地敝國君使勝致命以萬戶都三封太守

千戶都三封縣令皆世世爲侯吏民皆益爵三級吏民能相安皆賜之六金馮亭垂涕不見使者曰吾不處三不義也爲主守地不能死固不義一矣入之秦不聽主令不義二矣賣主地而食之不義三矣漢書馮奉世傳趙封亭爲華陵君與趙將括拒秦死于長平

廉頗韓馮亭以上黨歸趙秦使左庶長王齕攻韓取上黨上黨民走趙趙軍長平以按據上黨民齕因攻趙趙使廉頗將趙軍士犯秦斥兵秦斥兵斬趙裨將茄六月陷趙軍取二部四尉七月趙軍築壁壘而守之秦又攻其壘取二尉敗其陣奪西壘辟廉頗堅壁以待秦秦數挑戰趙兵不出趙王數以爲讓而秦相應侯又使人行千金于趙爲反間趙因使趙括代頗將以擊秦

澤州府志

卷之三十三

宦蹟

五五

三國魏杜畿太祖既定河北而高幹舉并州及河東人衛固范先與幹通謀張晟寇殺滎間拜畿爲太守固等奉之會白騎攻東垣高幹入濩澤上黨諸縣殺長吏弘農執郡守固等密調兵未至畿知諸縣附已因出單將數十騎赴張辟拒守吏民舉城助畿者比數十日得四千人固與幹晟共攻畿不下略諸縣無所得會大兵至幹晟敗固等伏誅其餘黨皆赦之使復其居業是時天下郡縣皆殘破河東最先定少耗滅事在漢代

王宰忠武節度使討昭義劉稹宰治軍嚴整昭義人甚憚之賊將薛茂卿與宰通謀宰引兵攻天井關茂卿小戰遽引兵走遂克天井關守之關東西寨間茂卿不守皆退走宰遂焚大小箕村茂卿入澤州使謀召宰宰疑不敢進賊知

之殺茂鄉宰進攻澤州與劉公直戰不利公直乘勝復大井關宰進擊公直大破之遂圍陵川克之會昌四年夏四月宰進攻澤州八月郭誼以潞降于宰澤州劉公直亦降石雄會昌三年討劉稹詔令王茂元取澤州李彥佐劉沔取潞州以石雄爲彥佐副因以代之雄代彥之明日卽引兵踰烏嶺破五寨殺獲千計上喜謂宰相曰雄眞良將也後郭誼降乃詔雄將七千人入潞州

李存孝大順初汴將李讜攻李罕之於澤州罕之告急于李克用遣存孝救之汴士呼罕之曰公倚沙陀絕大國今太原被圍葛司空入上黨不旬日沙陀無穴處矣存孝怒引兵五百薄讜營呼曰我沙陀未穴者湏爾肉以飽吾軍請肥者出鬪鄧季筠引兵決戰存孝奮稍馳直取季筠讜夜走追至馬牢川敗之

澤州府志

卷之三十三

宦蹟

五六

北漢劉旻以張元徽爲先鋒自將三萬攻潞州遂圍之世宗禦之戰於高平楊衮望周師謂旻曰勁敵也未可輕動旻奮髯曰時不可失無妄言衮怒而去旻號令東偏先進王得中叩馬諫曰南風甚急非北軍之利也宜少待之旻怒曰老措大毋得妄沮吾軍風勢愈盛旻自麾赤幟收軍軍不可遏遂敗張元徽戰歿于陣

周世宗親征漢戰于高平劉旻敗周之後軍劉詞將之在後未至時已勝詞軍繼至因追擊之旻又大敗是時何徽樊愛能先遁宋太祖從戰高平將合徽愛能先遁太祖麾同列馳馬衝其鋒漢兵大潰乘勝攻河東城焚其門左臂中流矢世宗止之還拜殿前都虞侯領嚴州刺史

李筠并州太原人周昭義節度使恭帝卽位加檢校太尉宋太祖建隆初加兼中書令遣使諭以受禪筠卽欲拒命左右爲陳時數方備俛下拜貌猶不恭延使置酒遠索周太祖畫像懸壁涕泣不已賓佐惶駭遂結北漢起兵曰吾周朝宿將與世宗義同昆弟禁衛皆舊人聞吾之來必倒戈歸我遣人殺澤州刺史張福往據其城留子守節守上黨引衆南向太祖遣石守信高懷德將兵討之與監軍李崇矩攻大會寨下之太祖親督戰拔其城筠赴火死

未馬全義幽州薊人從周世宗戰高平以功遷散直指揮使宋初從征李筠筠退保澤州城小而固攻之未下太祖患之召全義賜食御榻前問計對曰筠守孤城若并力急攻立可殄滅倘緩之適足長其姦耳太祖曰此吾心也卽命

澤州府志

卷之三十三

宦蹟

五七

全義揮兵急擊之遂克其城

田紹斌汾州人宋初隨征李筠攻大會砦拔之又敗筠于澤州茶碾村筠保澤州紹斌鑿濠圍守流矢中左目部署韓令坤以其事聞及太祖召見于潞州殺晉軍益衆奪其鎧

甲

何漢榮仕北漢歸宋淳化二年以三班奉直克澤太行路巡檢所到接下如無其官每恨不識文字常于馬上著讀孝經所司案牘會有齟齬旋俾刊削後亦歷記雜出部位或微服潛遊探測奸偷伺訊強暴無能藏隱人以爲神澤牧王夢澤具留遷三班殿直從部署李繼隆于環慶明年却復本道太行險巖藏匿凶慝無時無之至是悉竄遁咸平二年城閭門祇候克舒盧等州軍都巡檢後王嗣宗牧并

州奏克澤潞晉絳威勝軍等州都巡檢千餘里岩洞溪壑
恃艱險者俱誘之歸命仕終如京使兵馬都監卒塋陽城
西北長子懷德右侍禁澤州管界巡檢

原非陽城人或人流寓碑文雖缺尚可考

金阿魯帶昭義節度使澤州舊隸昭義軍改隸孟州阿魯帶
奏澤州城郭堅完器械具備若屯兵數千臣能保之今聞
議遷于青蓮寺山寨距州既遠地形狹隘所容無幾一旦
有急所保者少所遺者多徒棄名城以失太行之險則沁
南昭義不可通矣詔澤州復隸昭義軍

張開賜姓完顏景州人初遷授澤州刺史權昭義軍節度興
定四年封上黨公以澤潞遠沁隸焉元光元年復取高平
縣及澤州二年潞州危急開奏封建公府以固屏藩今胡

澤州府志

卷之三十三

宦蹟

五八

天作出平陽郭文振徙河東公府獨臣與史詠而已乞升
澤沁二州爲節度以主守禦詔以澤爲忠昌軍沁爲義勝
軍恒山公武仙蔡州破後將士皆散仙無所歸獨從十人
渡河趣澤州爲戍兵所殺

明王好問字裕卿永平樂亭人舉進士爲御史巡按山西請
罷陽城鐵稅民大悅仕至南京戶部尚書贈太子少保
于謙錢塘人以兵部侍郎兼撫河南山西旣在官久威惠流
聞嘗輕騎自河內歷太行而盜有窺者謙厲聲叱之皆大
驚散去曰不知爲我公幸赦我

艾萬年米脂人神木叅將隸曹文詔東征連破賊于延家山
亢義村賈寨村

三十三卷終

